

UAL: I bilanz de l'atività e la endesfides per l davegnir

Da l'intervent portà dant dal conseier Luigi Chiocchetti a la Radunanza de la Ual: n contribut a la discusion segur de ütöl per l moviment e per la jent de Fascia

Politica - Te na radunanza che ge à dat grān lērga a la polemiches, n contribut segnificatif da tor dant desche basa de riflascion, discusion e lurier per l grop chiamà a ciapèr te man la redenes del moviment ladin ti egn che vegn l'é stat portà dal conseier provinzièl Luigi Chiocchetti. N intervent "da secretèr politich", se podessa dir, che à metù dant n muie de temes e costions concretes. N publicon chiò na lèria sintesi.

Aon chiamà int chesta Radunanza "per dèr n nef sbalz al Moviment con neva proponetes e neva persones. Chest se pel l fèr demò tras n dibatit che podessa ridefinir na linea politica chièra, na strategia e na proponeta politica bona de se tirèr dō la jent de Fascia". Aon dit che l'è ütöl aer n nef Diretif che posse se enjgnar a l'endesfida litala de l'uton del 2013 con n confront con dute le forze politiche su programes e projec e per chest cognon aer n Diretif, n President, n Secretèr, tel pien de le forze e che no vae a se mudar fora sul più bel de chest gran lurier che jà doman cognon riscomenzar a far con gaissa e determinazion. Ma no l'è demò l 2013: sarà le litazion nazionale, l'apuntament lital del 2015 ti comuns e ence per l Comun general che l vegnirà fat con n nef sistem tel cerner l Procurador e l Consei general. E anterint altre ocajon de jir e far jir a votar.

Chel che à fat e fasc la Ual

La Ual no pol se permeter de se endromenzar e spetar e sperar che la jent ge vae dō zenza aer laorà, se aer fat sentir e veder. Fosc no l'è chest l moment de far la lista de chel che l'Ual l'ha fat te sti primes 2 egn e mez de Legislatura; segur pode dir che l contribut de idee e proponete a livel provinziàl de chel che l'era te nosc program l'è stat fort e costant: la neva lege sul benesser de la familia, la normativa sui joegn per sia istruzion e formazion profesionala, le norme sul volontariat (reforma de protezion zivila e studafech) e sul sozial (contra l'alcol tra i jovegn, contra la violenza su fémene e tosa), l sostegn de le mesure perdevude tel bilanz per soscedar neve scomenzadive economiche de privac e imprese... e altre. E ge aon dat n gran ejempie al Trentin per l'atuazion de la reforma istituzionala co l'esser apèda a nesc amistradores (Procuradora, President del Consei General, Ombolc e aminstadores raprezentanc di comuns) e a nescia comunità tel meter a jir l CGF: na endesfida no amò deldut venta. No cognon molar, cognon seghitar a jir inant e se dar jù.

L'è tempes de endesfide senestre

Se troon te n moment che no l'è facile esser na Provinzia autonoma, no l'è facile esser na Mendranza linguistica, no l'è facile esser Ladins.

Anzi, proprio l'esser Mendranza ladina ge dasc festidech a tenc, e no demò a Trent.

Sion ti dis del dombrament: l'envit cogn vegnir ence da chiò a se declarar ladins, no demò per na costion de numeres ma per tirar fora chel sentiment de fona identità ladina, da Moena a Cianacei, che duc i fascegn à da semper ma che l va semper alimentà.

No volon begar coi Nonejes: volon demò prezisar che duc i teritories cogn jir dō l troi per declarar e far sentir sia identità. Ma i cogn l far, tel cajo di Nonejes, senza "scurtarele", tel respet del Statut de autonomia, de le norme de atuazion, de dute le legi del Trentin che se cruzia de Mendranze linguistiche, e tel respet del percors storich fat dai Ladins storic che vif te le valade entorn l Sela.

Cognon esser bogn de scutar la ousc de la jent de Fascia...

Aon n muie da far e chest Moviment l'ha de bisogn de n nef sbalz: neve proponete, neve idee, neve persone. Te sti ultimes egn no sion stac bogn, gio me mete anter i autres, de far apascionar la jent a chel che fazon, ai projec che se aon metù dant, ai obietives che volon arjonjer, a chela voa che aon semper de lurar ensema, per l ben de nescia jent.

Cognon scutar e tor sù le domane de la jent de Fascia, sordud de chi che fasc più fadia, de soe sociazion, de soa economia e de siöi joegn. Laorar a una per esser n partit de regoeta. Per chest cognon esser bogn de parlar con duc, ge dir nosce idee e projet, ge dar la possibilità de dir la sia, de portar idee neve e desvalive e dapò far sintesi e le trasformar te azion per l ben de la comunanza, chel "Ben comun".

L Moviment cogn se meter de più entorn a n desch coi operadores economics, bachegn, artejegn, boteghieres, albergatores e voluntariat, per scoitar e capir; e se no i vegn cognon jir noi a domanar.

Cognon se far sentir de più, dir la nescia sui desvalives problemes de nescia Val e ence su le costion del Trentin, de la Region e foravia: l contribut de idee che podon dar l'è gran e de valuta.

Cognon portar inant n projet complessif de svilup de nescia Val. Dir la nescia su olache volon jir. E meter al zenter de la proposta politica la Comunità, desche sistem complessif de relazion positive anter jent che spartisc storia, valores, teritorie e economia.

L Diretif che ne serf

Per far chest cognon aer n Diretif de persone che à voa de far e laorar, rich de idee e proponete zenza se tegnir de mal o pensar de dir valch de sbalià. Sordud chi più joegn: che i pode tor part a n projet per l ben de nescia comunanza. Cognon aer n temon politich fort, determinà, n pont de riferiment



L conseier provincial Luigi Chiocchetti.

segur che fae sintesi, con equilibrie, anter le desvalive sensibilità che l'è te n partit come chest. N temon che saesse interpretar la linea politica del Diretif e la portar foravia, te Val, anter la jent. Tegnir raporc segures e determiné co le altre Forze politiche, col President de la Provinzia con n costant colegament col Conseier provincial. Te sti doi egn e mez ne é mencià chest temon segur. Ti egn che vegn chest bisogn sarà ancora più fort: cogneron tratar co le forze politiche de na coalizion che no arà più a ciav Dellai, che à abù na sensibilità particolare per la comunità ladina.

L'autonomia de la UAL

La Ual no la vól se mescedar con nesciuna altra Forza politica, come che volesse valgungn, e se confonder con autres per far deventar l Conseier provincial n biot numer anter autres. Volon restar indipendenc, forc de n consens che cogneron jir a se vadagnar duc i di. Cogneron scombater con Forze politiche che no capisc nescia spezialità de mendranza, forse che volerà tor jù l Comun general de Fascia, forse che à più tornacont a secodir autres teritories.

Ades, a livel normatif, aon dut. Sion na Mendranza forta. De grà a chest Moviment politich, a l'empegn de chi che à laorà ti egn passé, aon l Conseier de derit, na Scola autonoma, l Comun general, la possibilità de autogoern de nescia Val. Ades chesta Val cogn meter a jir dut chel che l'è stat otegnù, e per chest l'ha bisogn de n Moviment fort e a una, olache vae int jent che dalbon a a cher l ben de la comunità; jent che se met a la leta e che vel laorar dalbon per l "ben comun" e per aidar a smaorar i raporc de unità, solidarietà e fradaa. Jent che, metui te na enciaria, aesse ence l'intelligenza de capir canche l'è ora de se far da na man per far post a altre persone con altre e desvalive idee, altre sensibilità.

Refudar le logiche de la spartijon di posc

L Moviment no l'è na fàbrica de de cargeghe da spartir. Cognon vardar de no crodar te la logica di

partic olache la spartijon de posc l'è l prim pensier. La jent no la n pol più de chela maniera de far politica, de sentir parlar de costion che no à nia a che veder coi problemes de duc di. La motivazion de se meter a la leta per far Politica, co la 'P' grana l'è dar n contribut al ben de la comunanza senza seconde o sconude finalità. No se va te la UAL percheche se sent odor de posc, cargeghe e enciaria, ma percheche se creit te la jent de Fascia e ti prinzipies e obietives del Moviment che i resta semper inant, endana e dapò da na litazion.

Olà volone jir ti egn che vegn?

Volon "binèr a una la forzes miore, la inteligenzes, la forzes economiche, sozièles e culturèles de Fascia per tor dant e portèr a soluzion te n spirit de colaborazion i problemes de la popolazion de la Val", disc nosc Statut.

Cognon esser coerenc con nescia identità, nescia storia, lengaz e cultura. E chest cogn jir ensema co l'economia: identità/cultura ladina e turism, svilup del teritorie, comunicazion, solidarietà te la Val e tel mond: no i é en contrast, i va ensema.

La UAL à volù con forza l Comun general de Fascia. L'è un di resultac più emportanc e l'è da sostegnir, zenza se sostituir te competenze amministrative che no é nosce, ma elaborar idee e projec, dir co che penson che sie miec per nescia comunità sui temes che va sorafora i comuns.

Co pensone e volone l davegnir de nesc teritorie? Co volone l svilup de nesc pajes, nosce mont, nosce frazion? Co volone che la jent se mōve te sta Val? Che projec fajone per tegnir a una bachegn e albergores? Che infrastruture? Con cale priorità? E olà? Fajone l 'trenin' o Metroland? Colegone le piste da schi o no? Che fajone del patrimonio de tabiè o ciase velge testimonesc de nescia storia che ancora ne resta? Le lascione jir dō brea jù? E di alberghes che no ge la fasc più? Lascione che jent da fora vegne a ne i portar demez?

Che fajone de le machinete 'robascioldi' che vegn metù semper de più te nesc bares e che porta roina per tante familie? Aone en ment che formazion ge dar a nesc joegn? Che prospettive de laoro o de studie? I manone fora a emparar i lengac e a se responsabilisar? O se i tegnone chigiò? E chel che i empara foravia volone che i lo porte de retorn te nescia comunità?

Cal élo nosc pensier, come Ual, canche vegn fora costion etiche o de coscienza? La jent la speta de ne sentir ence su cheste.

Tegnir adum e vardèr inant

Cognon laorar con idee e azion per l'unità de chesta Val. Ge dar de contra a la voa de spartir nescia Val: te Fascia aon da se n vardar da chi che vel tirar sù mures,

spartir, tor jù l Comun general, meter sù Provinzie ladine: fora da la storia, fora dal sens comun, fora da dut. Fascia la é una e entria, da Moena a Cianacei, ence se sun valch sfoi l'è firme tote sù tei tendogn o te le bétole. No l'è segur chest che fermerà l percors del CGF e de l'autogoern de chesta Val.

Per la Legislatura che vegn ge volerà se cordar col candidat President e altre Forze politiche su le costion prezise da portar inant. Dir che che ne prem e su chel esser determiné, e se lasciar le man libere su costion e provedimenc da valutar oita per oita.

Cogneron far na riflascion su la reala operatività che à n Conseier provincial ladin. Te na coalizion olache l'è int più Forze politiche ge vól troar na formula che consente a dute, ence a chela mendra, de esser raprezentade te la Jonta: no se pol ge corer dō oita per oita a l'Assessor 'de turno' per saver che che i à en ment o i à decidù su le desvalive costion che pol aer efec su la sozietà e l'economia de nescia val.

Cogneron far na riflascion sui raporc anter Conseier provincial e Procurador del CGF lità col nef sistem. No i poderà esser en contrast: l dialogh e la colaborazion cogn esser costanc e segures su dut. La piena atuazion de la riforma istituzionala con so Comun general no pol far condemano de elaborar na vijion de come che penson che cognerà esser i comuns ti raporc col CGF e anter de ic. Come che cognerà "esser" i comuns.

N ruol desche ladins te l'Euroregion e per l Statut

Come comunità de Fascia aon l doer se raportar co le altre comunità ladine entorn l Sela; smaorèr l'unità de duc i Ladins de la Dolomites l'è un di prinzipies fundamentai de nesc Statut. L coleament coi autres ladins e l contat con altre mendranze linguistiche l'è fundamental per aer più forza. Nosc picol partit cogn aver l'orgolie de se meter a ciav e vidar n prozess de unificazion che ne dae più lērga ence a livel nazional e european, aer n post te l'Euroregion, che à te so gremen popolazion speziale come noi, dir la nescia su le desvalive costion che aon en comun.

Ti egn che vegn se rejonerà del mudament del Statut de Autonomia: volone aer ousc canche se parla de modificar la 'carta fondamentale' de nescia autonomia?

Argomenc de riflascion n'aon teis; argomenc che l'Ual con so nef Diretif la cognerà se tor sù.

L'augurie l'è chel de se sentir e de esser duc de ütöl te sto Moviment per nescia jent, ognun con soa capacità e sensibilità.

Luigi Chiocchetti, conseier provincial ladin de la UAL